

Na primavera do 2006, tras o convenio firmado coa Xunta para realizar os Campamentos de Verán para mozas e mozos de 18 a 30 anos, iníciáanse os preparativos para facer unha réplica do choupán *José*, que foi rescatado do abandono na praia de Mourisca no ano 2000. Esta embarcación era a única que quedaba nos nosos areais, para preservala cara ao futuro, e o Concello mercouna por un módico prezo para Os Galos.

Un choupán é unha embarcación similar á coñecida gamela, coa peculiaridade de que o choupán ten dúas proas en vez de proa e popa, o que facilitaba a súa capacidade para manobrar entre as rochas.

Os primeiros pasos da man dos Galos foron medir, marcar e cortar as táboas que se empregarían para a reprodución. A segunda quincena de xullo foi a data da fazaña, quince días que quedaron reducidos a nove reais de traballo baixo as ordes do mestre carpinteiro, o señor Victorio, auxiliado polos monitores Lidia e Fernando á fronte dun atrevido equipo de mozas e mozos chegados dende Orense, Zamora, Madrid, Soria, Xixón, Lequeitio, Granada, Cadiz e Badaxoz entre outros.

Na primeira foto podemos ver os aspirantes a carpinteiros de ribeira ao lado do choupán orixinal que se pretende reproducir, na nave de

Pescadoira en Bueu. Os traballos facíanse nun estaleiro de Moaña en xornadas de mañá e tarde.

O mesmo grupo, baixo a dirección da veleira gala Teresa, ían facendo a vela que aparelaría dita embarcación.

Grazas a todos eles e á actuación pola noite dos duendes galos, o obxectivo puido facerse realidade. Dada a dificultade da tarefa, deciden poñerlle un nome reivindicativo e galego ao barco: *Faino ti*. Os autores, é obvio, quixeron dicirnos: "Nós fixemos o barco; o folio, a legalización e facelo navegar *faino ti*".

Cando o venres se presentou o barco para a súa botadura, o Vicepresidente da Xunta, Anxo Quintana, nun discurso de fin de campamento e como agradecemento pola súa aportación díxolles que "O rendemento amosado era perigoso e ao tempo digno de envexa para os grandes estaleiros navais da ría". Unha bromiña que, coma a nenos, deixou moi satisfeitos aos mozos aprendices de carpinteiro.

Todos saben que recuperaron unha embarcación a piques de ser esquecida e son conscientes do valor da súa obra. Por suposto que, se se achegan pola vila este ano (e sempre), están convidados a dar un paseo no choupán. Tamén o saben.

